



Komunikadu Imprensa
08 Marsu 2021

Komemora Loron Feto Internasionál ho tema “Lideransa Feto Iha Mundu Covid-19”

JSMP husu atu ema hotu kontribui hamenus violénsia hasoru feto

Iha 08 Marsu 2021, Timor-Leste selebra Loron Feto Internasionál nu’udar loron importante hodi fó rekoñesimentu ba kontribuisaun feto Timor-Leste no dezafiu sira ne’ebé feto sira enfrenta atu realiza igualdade. Tema ba loron mundiál feto tinan ida ne’e mak “Lideransa Feto Iha Mundu Covid-19.” Tema ne’e hili atu ko’alia kona-ba Estadu Timor-Leste nia komprimisu hodi asegura feto nia asesu ba seguransa, justisa, saúde, edukasaun, liberdade no mós iha direitu no oportunidade hanesan ho mane sira iha área hotu-hotu.

“Aproveita loron feto internasionál ne’e, JSMP kongratula feto hotu iha mundu liu-liu feto Timor-Leste ne’ebé mak sakrifika sira-nia an hodi proteje feto nia direitu no lori mudansa signifikante ba jersaun foun nia moris. Iha tempu hanesan, JSMP mós kontinua enkoraza ba ema hotu atu bele fó kontribuisaun atu hamenus violénsia hasoru feto tuir ida-diak nia papél no responsabilidade liuliu iha situasaun Covid-19, tanba iha situasaun sira hanesan ne’e sai mós hanesan dezafiu boot ba iha vítima feto sira atu bele hetan protesau ne’ebé adekuaadu,”dehan Sra. Ana Paula Marçal, Diretora Ezekutiva JSMP.

JSMP preokupa no tau kestaun nafatin ba asuntu violénsia bazeia ba jéneru tanba realidade hatudu maioria feto Timor-Leste kontinua vulnerável iha aspeitu oi-oin no sira kontinua sofre ba violénsia doméstika, violénsia seksuál, diskriminasaun no abandona.

Tuir rezultadu monitorizasaun JSMP nian iha tribunál distritál sira iha Timor-Leste katak tribunál sira sempre rejista kazu sira envolve feto no labarik nu’udar vítima ba krime oi-oin.

Iha tinan 2020, JSMP konsege monitoriza kazu violénsia hasoru feto no labarik feto iha tribunál sira hamutuk 494 husi total kazu 710 ne’ebé JSMP monitoriza*. Husi total kazu 494 ne’e, maioria aplika pena prizaun maibé suspende nia ezekusaun: kazu 251, kazu

* Total kazu sira ne’ebé JSMP monitoriza iha tribunál sira la representa total kazu sira ne’ebé tribunál julga. JSMP monitoriza tuir rekursu umanu JSMP nian nune’e la kobre julgamentu hotu ne’ebé tribunál julga.

91 aplika pena multa no 37 aplika pena prizaun. Entretantu iha tinan 2021, husi Janeiru to'o Marsu, JSMP konsege monitoriza kazu violénsia hasoru fetu no labarik hamutuk 53. Kazu sira ne'e 13 tribunál aplika pena prizaun maibé suspende nia ezekusaun, kazu 6 aplika pena multa no kazu 1 mak kondena ho pena prizaun.

Aleinde kazu sira ne'ebé JSMP monitoriza iha tribunál, JSMP mós fó atendimentu ka simu keixa husi vítima fetu no labarik ne'ebé hetan violénsia ka hasoru problema ruma. Iha tinan 2020, JSMP konsege simu keixa hamutuk kazu 36 (krime 34 no sivíl 2). Husi kazu 36 ne'e maioria klasifika nu'udar krime violénsia doméstika ho tipu ofensa ba integridade fízika simples, tuir fali violasaun seksuál no abuzu seksuál.

Entretantu iha 2021, JSMP konsege simu keixa hamutuk 8 no hotu-hotu klasifika nu'udar krime. Kazu sira ne'e maioria violénsia doméstika, violasaun seksuál no abuzu seksuál ba menór.

JSMP konsidera katak iha situasaun réal Timor-Leste nian agora hatudu katak presiza duni atendimentu ida ne'ebé mak sériu husi governu no instituisaun relevante sira atu prevene no proteje fetu hotu iha tempu pandemia Covid-19 ne'e.

Relasiona ho komemorasaun loron importante ne'e, JSMP hakarak hato'o parabéns no kongratula ba fetu hotu iha mundu, liu-liu fetu Timor-Leste ne'ebé korazen no kontinua luta hodi defende maluk fetu sira-nia direitu no luta ba lia-loos no justisa.

Atu hetan informasaun liutan favór kontaktu:

Ana Paula Marçal
Diretora Ezekutiva JSMP
Email:ana@jsmp.tl
Telefóne: 3323883 | 77040735

Rua Beco Lakateu, Aldeia Manu fuik,
Suku Colmera, Administrativu Vera Cruz
Dili Timor Leste
PoBox: 275
Telefone: 3323883 | 77040735

www.jsmp.tl

luis@jsmp.minihub.org

Facebook: www.facebook.com/timorleste.jsmp

Twitter: @JSMPtl